

畿輔安瀾志

白河卷一

原委

白河卷二

原委

白河卷三

附載

隄防

橋渡

白河卷四

修治

官司

祠廟

水利

畿輔安瀾志

臣王履泰恭纂

白河卷一

原委

白河其上源沽河也源出宣化府赤城縣北獨石口邊外一曰隄頭河一曰獨石泉

〔漢書地理志〕漁陽郡漁陽沽水出塞外東南至泉州入海行七百五十里

〔水經〕沽河從塞外來酈注沽

河出禦夷鎮西北九十里丹花嶺下

〔方輿紀要〕獨

晉書地理志
石水在開平衛南流注雲州堡合于龍門川一統
志隄頭河在上都牧廠南界土人名大藍兔祿河在
獨石口西北二十五里源出狗牙山東南流入獨石
口狗牙山在上都牧廠南土人名克新喀喇諾海山
直獨石口西北二十七里〔口北三廳志〕卽沽水上
源狗牙山舊丹花嶺也

〔謹案〕北方諸水惟沽河源流最混其名稱亦亂以其

下至通州合東西二路水故謂之潞河

通典密雲郡檀州密雲有

潞水自塞外流入

明統志潞水自塞外

丹花嶺合九泉水南流逕密雲縣東北以其與潮

河合故謂之鮑邱水亦曰潮河

太平寰宇記潞縣潞河一名沽河一名鮑

邱水北自檀州密雲縣流入

方輿紀要白河

卽潮河

又以其與白馬關入之白河合流于石塘嶺故又謂之白河

方輿紀要白河亦名潞河亦曰沽水

水經鮑邱水

出禦夷北塞中志云河兩岸皆白沙不生青草故名

亦曰潞河又沽河亦曰白河

要皆非其本名也說水

者當以漢書地理志水經注爲據漢志水經注惟有

沽河之一名別無他號也其合潞處在下尾安得卽

以追被上源且其與潮河合處舊在順義縣北二十

里之牛欄山之東麓今改于密雲縣南十八里明嘉

靖中遏絕之不使入順義縣欲水勢盛漲以通密雲
餉道故也或以爲于口外霧靈山與潮河合非也辨
見後 又案一統志又有獨石泉在鑲白旗牧廠東
南五十里蒙古名烏里爾齊老泉又有獨石山在上
都牧廠東北直獨石口東北二百三十里蓋泉源之
遠如此疑別是一山泉也然徧考別無泉源又輿圖
云沽水發源喀喇河屯熱河西南境之塔綳拖落海
有他賁拖落海山在上都牧廠西南直獨石口西北
一百五十里河曰隨客河疑卽隄頭河之異名南流

逕大馬鄂模則有烏藍呼都克之水會之又東南流
逕庫勒鄂模又東南流逕五可見河又東南流逕七
老巴爾哈孫卽古隰甯廢驛也一統志在獨石北三十里又南流
逕嗎尼圖嶺亦名麻尼圖嶺卽鐵幡竿嶺也一統志在獨石北三十里
口北三十里南流入口

自上都牧廠南其北與正白旗察哈爾牧廠交界南流
逕獨石口同知屬之馬神廟又南流十里逕喇嘛洞

口北三廳志大喇嘛洞獨石口西北丁莊子灣東北
四十里小喇嘛洞大喇嘛洞東南十里

又南流二里逕棠梨溝則有九泉水注之

〔水經注〕沽河又南九泉水注之水導北川左右翼注入川共成一水故有九源之稱其水南流至獨石注大谷水〔長安客話〕潞水自塞外丹花嶺合九泉水

〔口北三廳志〕九泉水獨石口北三十里棠梨溝有泉九源並發合流注于隄頭河南入獨石口

又南流五里逕神明鏡溝

〔口北三廳志〕明鏡溝獨石口西北二十八里

又南流六至逕龐家窯又南流四里逕滅虎溝又南流

四里逕北柵口入邊城

〔宣化府志〕北柵口東至萬勝樓五里二百一十三步
西至鎮衝樓三里通口外多倫諾爾開平城土城子
張家口等處地方 〔赤城縣志〕獨石水關卽北柵口
又南流五里逕獨石城西北則有西柵口之水自西北
來注之

〔謹案〕此水所流僅三里口北三廳志以爲卽水泉水
今其上流乾涸故所行不遠

又南流五里逕獨石城南之獨石神廟前與東柵口水

合卽大砦溝河也又有紅山水自口外流入之

〔水經注〕大谷水發鎮北大谷谿西南流逕獨石北界石孤生不因河而自峙〔口北三廳志〕大砦溝河獨

石口東北三十里西南流入獨石東柵口至城南獨石廟與沽水合疑卽古大谷水也〔畿輔通志〕水在

赤城縣東其源有二皆自塞外流入一曰獨石水由

獨石口逕獨石城西爲西河一曰紅山水由紅石山

逕獨石城東爲東河俱流至城南而合〔一統志〕有

城西河在開平衛西五里發源口外夾城東南流至

衛南與城東河合其水亦自口外流入經衛東五里
又南合流

謹案是水發源口外其源不遠然與獨石水東西合
流于獨石口城南故有東西河之名三廳志以爲大
谷水似已考水經注大谷水又南逕獨石西又南逕
禦夷城西又東南尖谷水注之亂流南注沽水則是
大谷水當爲西河乃大砦溝水則在獨石東北谷水
縱有遷移獨石必無改動大砦溝之爲大谷水亦非
可定以爲是也又東柵口外之山名東高山西柵口

外之山名西高山

方輿紀要東高山在開平衛東三十里西高山在龍門所西五十里

城東河卽大砦石溝河城西河卽水泉河大砦溝河

源發東高山南流逕先農壇

口北三廳志先農壇在獨石口東柵子外入

東柵口至城南獨石亭

卽獨石神廟

而注于沽河長三十

里西柵子水發源支鍋石

口北三廳志鑛腳口獨石口西北十里有巨石三面

鼎峙相去各百餘步如鑛腳故名俗呼支鍋石

流三里許亦注于沽河此二

河于入口處最爲切近故著之考東柵口之水爲城

東河西柵口之水爲城西河固已然畿輔通志所指

名東河西河者乃自口外西爲獨石水東爲紅山水

二支乃川流也不數支鍋石水者以其水絕小又平時乾涸也與一統志所云城東城西二水有別又沽水下流逕赤城縣東北外故統得東河之名方輿紀要云葦菜川在開平衛東源出東山流逕衛南與檀帽山水合流至赤城堡爲東河之源名勝志赤城堡之東河由獨石雲州堡東南流卽通州白河之上源考三廳志有葦菜坪在張家口北一百三十里川以地得名張家口在獨石口之西則是水當在獨石口城西不當云東也卽有此川所行不遠盈涸無時城

東之水惟大砦溝一支耳更無他水足以應之紀要所謂韭菜川爲東河之源者殆不足據名勝志以東河卽通州白河之上源此是由石塘嶺入口之一支亦非此東河也辨見後 又案紅山水出紅石山求之地理不得其處明史地理志龍門衛紅石山水出焉下流合于龍門川方輿紀要紅山水在龍門衛東源出紅石山東北流逕雲州堡合于龍門川則是紅山水之爲紅石山水無二說也特獨石水與紅石山水俱自口外入逕獨石城則已合流矣而方輿紀要

又載紅山水云在馬營堡東南二十里山勢高險石
色多赤下有紅泉東流合大河入龍門峽畿輔通志
仍之旣載紅山又載紅石山云龍門縣東五里上產
紅石可供玩好口北三廳志紅石嵯在獨石口南清
水堡東北則又另有一紅石山也又赤城縣有紅石
井水獨石城內舊有紅泉亦皆非出自紅石山也詳
見後

二水合流而南

獨石水大
谷水也

十八里逕頭堡子西又南流

十里逕半壁店西

明史地理志開平衛南有半壁店

又南流十里逕三山堡西又南流十里逕貓兒峪西則有清泉堡之水自北來注之

方輿紀要貓兒峪在半壁店堡雲南州所北道出開平者此爲中路清泉堡在開平衛東北邊外山下有清泉湧出達堡東因名〔口北三廳志清泉淀清泉堡口外合黃榆鎮北二溝之水流入邊內堡名以此謹案清泉堡水在獨石城東北發源口外西南注于貓兒峪之南下入龍門川其長三十里

又南流十里逕舊站堡西出龍門峽是爲龍門川

〔水經注〕大谷水又南逕獨石西又南逕禦夷鎮西又東南尖谷水注之亂流南注沽水又南出峽岸有二城世謂之獨固門 〔遼史地理志〕奉聖州龍門縣有龍門山石壁對峙高數百尺望之若門徼外諸河及沙漠諸水皆于此趨海雨則俄頃水濤千仞晴則清淺可涉實塞北控扼之要也在州東北二百八十里

〔明史地理志〕雲州堡東北有龍門山亦曰龍門峽下爲龍門川 〔方輿紀要〕龍門川在堡東北可五十